
Ordinaziun tar la lescha davart la promoziun da la cultura (ordinaziun davart la promoziun da la cultura, OPC)

dals 12-12-2017 (versiun dals 01-01-2018)

Sa basond sin l'art. 45 al. 1 da la constituziun chantunala¹⁾

relaschada da la regenza ils 12 da december 2017

1. Disposiziuns generalas

Art. 1 Cumpetenzas

¹ Il departament d'educaziun, cultura e protecziun da l'ambient (departament) procura per l'execuziun da la lescha davart la promoziun da la cultura²⁾ ed exequescha tut las cumpetenzas che n'èn betg vegnidas transferidas ad in'autra autoritad u unitad administrativa. Il post da servetsch chantunal è l'uffizi da cultura (uffizi).

² L'uffizi tgira il contact cun las instituziuns e cun las federaziuns en ils secturs da la cultura, dal mantegniment e da la promoziun da las linguas sco er da la perscrutaziun da la cultura.

2. Concept per promover la cultura

Art. 2 Elavuraziun

¹ Il concept per promover la cultura vegn elavurà en collavuraziun cun las organisaziuns culturalas dal Grischun e cun la cumissiun da cultura.

¹⁾ DG [110.100](#)

²⁾ DG [494.300](#)

* tabellas da las modificaziuns a la fin dal relasch

Art. 3 Cuntegn

¹ Il concept per promover la cultura furma la basa per decisiuns futuras da la politica culturala e duai en spezial:

- a) mussar la situaziun actuala en ils differents secturs da la promoziun da la cultura;
- b) definir puncts centrals concrets per la promoziun da la cultura entaifer ils proxims 4 onns e preschentar mesiras per realisar quests puncts centrals;
- c) resguardar la collavuraziun tranter il chantun, las regiuns, las vischnancas e persunas privatas sco er ils secturs da promoziun tenor l'artitgel 8 da la lescha davart la promoziun da la cultura¹⁾.

3. Cumissiuns

Art. 4 Cumissiun da cultura
1. cumposiziun

¹ La cumissiun da cultura consista da set commembras u commembers. La direcziun da l'uffizi fa part da la cumissiun cun vusch consultativa.

Art. 5 2. incumbensas

¹ La cumissiun da cultura:

- a) cusseglia la regenza ed il departament en dumondas da la promoziun da la cultura, cunzunt er tar l'elavuraziun e tar la controlla dal concept per promover la cultura;
- b) examinescha per regla dumondas da contribuziun da passa 20 000 francs e fa in'expertisa per mauns da la regenza u dal departament;
- c) fa propostas per conceder premis tenor l'artitgel 16 da la lescha davart la promoziun da la cultura²⁾.

² La cumissiun da cultura sto vegnir orientada regularmain davart la lavur da las cumissiuns spezialas.

Art. 6 Cumissiun speziala per concurrenzas

¹ Per promover la lavur culturala professiunala elegia il departament ina cumissiun speziala che ha l'incumbensa d'organisar las concurrenzas per stipendis e per contribuziuns ad ovras sco er d'inoltrar las propostas al departament.

² La cumissiun sa cumpona da tschintg fin set commembras e commembers. L'uffizi fa part da la cumissiun cun vusch consultativa.

¹⁾ DG [494.300](#)

²⁾ DG [494.300](#)

Art. 7 Ulteriuras cumissiuns spezialas

¹ Per realisar mesiras en ils differentes secturs da promoziun po il departament nominar ulteriuras cumissiuns spezialas.

Art. 8 Indemnisaziun

¹ Las commemoras ed ils commembers da la cumissiu da cultura e da las cumissiuns spezialas valan sco collavuraturas e collavuratur en uffizi accessoric e vegnan indemnisads tenor l'ordinaziun davart las collavuraturas ed ils collavuratur en uffizi accessoric dal chantun Grischun¹⁾.

Art. 9 Concorrenzas

¹ Stipendis e contribuziuns ad ovras vegnan concedids en il rom d'ina concorrenza annuala a personas che lavuran sin il champ cultural, che han in potenzial da svilup en lur activitad e che pon preschentar plans u projects concrets per lur ovra. Contribuziuns ad ovras promovon l'elavuraziun tematica da projects che persvadan or dal punct da vista cultural, ch'èn autonom e ch'èn realisabels.

² L'autezza d'in stipendi u d'ina contribuziun ad in'ovra importa maximalmain 20 000 francs per onn.

Art. 10 Dretg da survegnir stipendis e contribuziuns ad ovras

¹ Autorisadas da sa participar a las concorrenzas èn personas che lavuran sin il champ cultural e che:

- a) han lur domicil dapi almain 2 onns en il chantun; u
- b) han ina stretga relaziun cun il chantun Grischun u cun la cultura grischuna.

² La medema persona po survegnir tut en tut maximalmain trais giadas in stipendi u ina contribuziun ad in'ovra.

³ Per scolaziuns che han il dretg da survegnir ina contribuziun tenor la lescha da stipendis²⁾, na vegnan betg concedids stipendis u contribuziuns ad ovras en il rom da questa concorrenza.

4. Mesiras da promoziun spezialas

Art. 11 Perscrutaziun da la cultura

¹ La premissa per sustegnair projects scientifics per perscrutar il spazi cultural e vital dal Grischun èn:

- a) la qualificaziun da las personas exequentas;
- b) l'importanza dal project per la perscrutaziun da la cultura grischuna.

¹⁾ DG [170.420](#)

²⁾ DG [450.200](#)

Art. 12 Cumpras

¹ En cas da cumpras vegnan per regla resguardadas ovras da personas che lavuran sin il champ cultural e che vivan en il Grischun.

Art. 13 Cunvegnas da prestaziun

¹ Cunvegnas da prestaziun cun instituziuns culturalas vegnan concludidas dal departament u da la regenza.

² Ellas cuntengnan en spezial ina descripziun da las finamiras e da las prestaziuns da l'activitad culturala da l'instituziun, la contribuziun da gestiun annuala che vegn empermissa dal chantun sco er disposiziuns concernent il controlling e la rapportaziun.

³ Cunvegnas da prestaziun vegnan concludidas per regla per ina perioda da 4 onns.

Art. 14 Programs prioritars

¹ La concessiun da contribuziuns a programs culturals prioritars premetta ch'i saja avant maun in concept general da l'uniun da tetg chantunala cumpetenta. Quest concept general sto vegnir approvà da la regenza.

² Sa basond sin il concept general fixescha la regenza las expensas cun dretg da survegnir contribuziuns.

Art. 15 Curs culturals professionals

¹ A curs professionals èn imputabels ils onuraris per las referentas ed ils referents, per las manadras ed ils manaders dals curs sco er ils custs per il tschains da locaziun dals locals. Il departament fixescha las tariffas imputablas.

² A basa da las dumondas inoltradas fixescha il departament las singulas contribuziuns.

5. Scolas da chant e da musica

Art. 16 Custs imputabels

¹ La contribuziun per unitad d'instrucziun vegn calculada or da la tariffa per ura cun dretg da survegnir subvenziuns per ina persuna d'instrucziun da la scola primara tenor la lescha da scola¹⁾, plus 20 pertschient custs accessorics al salari sco er 20 pertschient ulteriurs custs.

² Ina unitad d'instrucziun imputabla dura 60 minutas.

¹⁾ DG [421.000](#)

Art. 17 Instrucziun individuala

¹ Per scolara u scolar dastgan vegnir messas a quint per onn en media maximalmain 14 unitads d'instrucziun.

² Sin dumonda da l'associaziun da las scolas da chant e da musica dal Grischun po il departament permetter excepziuns.

Art. 18 Modalitads da rendaquint e da pajament

¹ Suenten la scadenza da l'onn chalendar preschantan las vischnancas u las scolas da chant e da musica fin il pli tard la mesadad da favrer al departament ina dumonda, da la quala resorta il dumber da scholaras e scholars, las unitads d'instrucziun cun dretg da survegnir contribuziuns sco er las contribuziuns annualas da las vischnancas e d'autras corporaziuns da dretg public per mintga singula scola.

² A basa da questa dumonda vegnan pajadas las contribuziuns a las vischnancas u a las singulas scolas.

³ Il chantun surpiglia pajaments parzials da tut en tut maximalmain 80 pertschient da l'ultim rendaquint per contribuziuns chantunalas.

6. Finanziaziun

Art. 19 Finanziaziun speziala da la lottaria naziunala

¹ En il rom dal preventiv metta la regenza a disposiziun credits annuals or da la finanziaziun speziala da la lottaria naziunala, e quai en spezial per:

- a) contribuziuns a la promoziun da la cultura;
- b) contribuziuns a la cultura da giuventetgna;
- c) contribuziuns per promover la lavur a titel professiunal e la perscrutaziun.

Art. 20 Acquisiziuns da medias

¹ A basa da las dumondas inoltradas fixescha il departament las singulas contribuziuns per acquisiziuns da medias.

² El po designar las medias cun dretg da survegnir contribuziuns e reglar la procedura.

³ Contribuziuns a las acquisiziuns da medias da l'onn precedent ston vegnir inoltradas al departament mintgamai fin ils 31 da schaner agiuntond ils documents pretendids.

Tabella da las modificaziuns - tenor conclus

Conclus	Entrada en vigur	Element	Modificaziun	Publicaziun en la CUL
12-12-2017	01-01-2018	relasch	emprima versiun	2017-042

Tabella da las modificaziuns - tenor element

Element	Conclus	Entrada en vigor	Modificaziun	Publicaziun en la CUL
relasch	12-12-2017	01-01-2018	emprima versiun	2017-042